

羅山道保福秋間上府朝覲大王置四十箇問頭問和尚忽若一句不相當莫言不道僧舉似師師呵呵大笑曰陳老師自入福建道洪塘橋下一寨未曾見有箇毛頭星現汝與我向從展道陳老師無許多問頭祇有一口劔一劔下有分身意有出身路不明便須成末僧回舉似福福曰我當時也祇是謔伊至秋入府師特爲辦茶筵請福福不赴却向僧曰我中間曾有謔語恐和尚問著僧歸舉似師曰汝向他道猛虎終不食伏肉僧又去福遂來臨遷化上堂集衆良久展左手主事罔測乃令東邊師僧退後又展右手

令西邊師僧退後乃曰欲報佛恩無過流通大教歸去也珍重言訖莞爾而寂
系曰巖頭門下得法者傳燈現錄六人而三彥一閑最著僧統僅傳瑞岩彥而玄泉彥與閑師不載予故表之使知黃龍明招二公所自出也

黃龍機明招謙傳

黃龍山誨機禪師清河張氏子初參巖頭問如何是祖師西來意頭曰你還解救糍麼曰解頭曰且救糍去後到玄泉又問泉拈起一莖皂角曰會麼師不會泉放下作洗衣勢師便禮拜曰信知佛法無別泉曰

見甚道理師曰某甲問巖頭頭曰你解救糍麼救糍也祇是解粘和尚提起皂角亦是解粘所以道無別泉呵呵大笑師遂有省唐天祐中游化至此山節帥施俸建宇奏賜紫衣師號大張法席師將順世有僧問百年後鉢囊子何人將去師曰一任將去曰裏面事如何師曰線綻方知曰何人得師曰海燕雷聲卽向汝道言訖告寂先是呂岩真人洞賓京川人唐末三舉不第偶於長安酒肆遇鍾離權授以延命術自爾人莫之究嘗遊廬山歸宗書鐘樓壁曰一日清閑自在身六神和合報平安丹田有寶休尋道對境無心莫問禪未幾道經黃龍山覩紫雲成蓋疑有異人乃入謁值師擊鼓升堂師見意必呂公也欲誘而進厲聲曰座旁有竊法者呂毅然出問一粒粟中藏世界半升鎗內煮山川此意如何師指曰這守尸鬼呂曰爭奈囊有長生不死藥師曰饒君八萬劫終是落空亡呂薄訝飛劒脅之不能入遂再拜求指歸師詰曰半升鎗內煮山川卽不問如何是一粒粟中藏世界呂言下頓契作偈曰棄却瓢囊撼碎琴如今不戀汞中金自從一見黃龍後始覺從前錯用心師囑令加護

明招德謙禪師受羅山印記靡滯于一隅激揚玄旨諸老宿畏其敏捷後學鮮敢當者嘗到昭慶指壁畫問僧那箇是甚麼神曰護法善神師曰會昌沙汰時何處去來僧無對師令問演侍者演曰汝甚劫中遭此難來僧回舉似師師曰直饒演上座他後聚一千衆有甚用處僧禮拜請別語師曰甚麼處去也次到坦長老處坦曰夫參學一人所在亦須到半人所在亦須到師便問一人所在卽不問作麼生是半人所在坦無對後令小師問師師曰汝欲識半人所在祇是弄泥團漢清上座舉仰山插鋏話問師古人意在义手處插鋏處師召清清應話師曰還夢見仰山麼清曰不要上座下語祇要商量師曰若要商量堂頭自有一千五百人老師在又到雙岩巖請喫茶次曰某甲致一問若道得便捨院與闍黎住若道不得卽不捨院遂舉金剛經云一切諸佛及諸佛阿耨多羅三藐三菩提法皆從此經出且道此經是何人說師曰說與不說拈向這邊著祇如和尚決定喚甚麼作此經巖無對師曰一切賢聖皆以無爲法而有差別祇如差別是過不是過若是過一切賢聖皆是過若不是過決定喚甚麼作差別巖亦無語師曰噫雪峰

道底師訪保寧中路相遇便問兄是道伴中人乃點鼻頭曰這箇礙塞我不徹與我拈却少時得麼寧曰和尚有來多少時師曰噫泊賺我踏破一緇草鞋便回國泰代曰非但某甲諸佛亦不奈何師曰因甚麼以已方人師在婺州智者寺居第一座尋嘗不受淨水主事嗔曰上座不識觸淨爲甚麼不受淨水師跳下床提起淨瓶曰這箇是觸是淨事無語師乃撲破師有師叔在廨院患甚附書來問曰某甲有此大病如今正受疼痛一切處安置伊不得還有人救得麼師乃復曰頂門上中此金剛箭透過那邊去也有一僧曾在師法席辭去住菴一年後來禮拜曰古人道三日不相見莫作舊時看師乃露胸問曰汝道我有多少蓋膽毛僧無對師却問汝什麼時離菴曰今朝師曰來時折腳鐺子分付與阿誰僧又無語師乃喝出師住明招山四十載語句流布四方將欲遷化上堂告衆囑付其夜展足問侍者曰昔釋迦如來展開雙足放百寶光明汝道吾今放多少侍者曰昔日鶴林今日和尚師以手拂眉曰莫辜負麼說偈曰驀刀叢裏逞全威汝等應當善護持火裏鐵牛生犢子臨岐誰解湊吾機偈畢安坐寂然長往今塔院存焉

系曰常言學仙須骨學佛須緣洞賓蓋有骨有緣者耳然非黃龍手段斬截恐此漢未易壓倒明招悟入沒量如鄧天君下視草木皆焦所謂但知盡法不顧無民由是知巖頭門日孤冷弗振不得如象骨老子法澤綿長矣

太原上座傳

太原孚上座初在揚州光孝寺講涅槃經有禪者阻雪因往聽講至三因佛性三德法身廣談法身妙理禪者失笑師講罷請禪者啜茶白曰某甲素志狹劣依文解義適蒙見笑且望見教禪者曰寔笑座主不

識法身師曰如此解說何處不是曰請座主更說一遍師曰法身之理猶若太虛豎窮三際橫亘十方彌綸八極包括二儀隨緣赴感靡不周徧曰不道座主說不是祇是說得法身量邊事寔未識法身在師曰既如是禪德當爲我說曰座主還信否師曰焉敢不信曰座主試輟講旬日掩關端坐收心攝念善惡諸緣一時放却師一依所教從初夜至五更聞鼓角聲忽然契悟便去叩門禪者曰誰師曰某甲禪者咄曰教汝傳持大教代佛說法夜來爲甚醉酒臥街師曰禪德自來講經將生身父母鼻孔扭捏今已去更不

敢如是禪者曰且去來日相見師遂罷講徧歷諸方
名聞宇內嘗游浙中登徑山法會一日于大佛殿前
有僧問上座曾到五臺否曰到見文殊否曰見甚處
見曰徑山佛殿前見其僧後適閩川舉似雪峰峰曰
何不令人嶺來師聞趨裝而往初至峰廡院憩錫因
分柑子與僧長慶問甚處將來師曰自嶺外曰遠涉
不易擔負得來師曰柑子柑子次日上山雪峰聞乃
集衆師到法堂上顧視雪峰便下看知事明日却上
禮拜曰某甲昨日觸忤和尚峰曰知是般事便休峰
一日見師乃指日示之師搖手而出峰曰汝不肯我
耶師曰和尚搖頭某甲擺尾甚麼處是不肯峰曰到
處也須諱却一日衆僧晚參峰在中庭臥師曰五州
管內祇有這老和尚較些子峰便起去峰嘗問師見
說臨濟有三句是否師曰是曰作麼生是第一句師
舉目視之峰曰此猶是第二句如何是第一句師叉
手而退自此雪峰深器之室中印解師資道契更不
他游而掌浴焉一日玄沙上問訊雪峰峰曰此間有
箇老鼠子今在浴室裏沙曰待與和尚勘過言訖到
浴室遇師打水沙曰相看上座師曰已相見了沙曰
甚劫中相見師曰瞌睡作麼沙却入方丈白峰曰已

勘破了峰曰作麼生勘伊沙舉前話峰曰汝著賊也
鼓山問師父母未生時鼻孔在甚麼處師曰老兄先
道山曰如今生也汝道在甚麼處師不肯山却問作
麼生師曰將手中扇子來山與扇子再徵前話師搖
扇不對山罔測乃毆師一拳鼓山赴大王請雪峰門
送同至法堂乃曰一隻聖箭直射九重城裏去也師
曰是伊未在曰渠是徹底人師曰若不信待某甲去
勘過遂趨至中路便問師兄甚處去山曰九重城裏
師曰忽遇三軍圍繞時如何山曰他家自有通霄路
師曰恁麼則離宮失殿去也山曰何處不稱尊師拂
袖便回峰問如何師曰好隻聖箭中路折却了也遂
舉前話峰乃曰奴渠語在師曰這老凍膿猶有鄉情
在師在庫前立有問如何是觸目菩提師踢狗子作
聲走僧無對師曰小狗子不消一踢保福簽瓜次師
至福曰道得與汝瓜喫師曰把將來福度與一片師
接得便去師不出世諸方目爲太原孚上座後歸維
揚陳尚書留供養一日謂尚書曰來日講一遍大涅槃
經報答尚書書至期致齋茶畢師遂陞座良久揮
尺一下曰如是我聞乃召尚書書應諾師曰一時佛
在便乃脫去

大靜小靜傳

國清寺師靜上座始遇玄沙和尚示衆云汝諸人但能一生如喪考妣吾保汝究得徹去師乃躡前語問曰只如教中不得以所知心測度如來無上知見又作麼生玄沙曰汝道究得徹底所知心還測度得及否師從此信入後居天台三十餘載不下山博綜三學操行孤立禪寂之餘常閱龍藏遐邇欽重時謂大靜上座嘗有人問曰弟子每當夜坐心念紛飛未明攝伏之方願垂明誨師答曰汝將紛飛心以究紛飛處究之無處則紛飛之念何存返究究心則能究之心安在又能照之智本空所緣之境亦寂寂非寂者無能寂之人照非照者無所照之境境智俱寂心慮安然外不尋枝內不住定二途俱泯一性怡然此乃還源要道也師因覩教中幻義乃述一偈問諸學流偈曰若道法皆如幻有造諸過惡應無咎云何所作業不忘而藉佛慈興接誘時有小靜上座荅曰幻人興幻幻輪圍幻業能招幻所治不了幻生諸幻苦覺知如幻幻無爲二靜上座並終本山今國清寺遺蹤在焉

烏巨晏禪師傳

烏巨山儀晏禪師吳興許氏子於唐乾符三年將誕之夕異香滿室紅光如晝光啓中隨父鎮信安強爲娶師不願遂歷諸方機契鏡清歸省父母乃於郭南剏別舍以遂師志舍旁陳司徒廟有凜禪師像師往瞻禮失其所之後郡守展祀祠下見師入定廟後叢竹間蟻蠹其衣敗葉沒胫或者云是許鎮將子也自此三昧或出或入子湖訥禪師未知師造問曰子所住定蓋小乘定耳時方啜茶師呈起橐曰是大是小訥駭然尋謁栝倉唐山德嚴禪師嚴問汝何姓曰姓許嚴曰誰許汝曰不別嚴嘿識之遂與剏染嘗令摘

桃浹旬不歸往尋見師攀桃倚石泊然在定嚴鳴指出之開運中游江郎巖覩石龕謂弟子慧興曰予入定此山汝當壘石塞門勿以吾爲念興如所戒明年興意師長往啓龕視之師素髮披肩胸臆尚煖徐自定起了無異容復回烏巨侍郎慎公鎮信安馥師之道命義學僧守榮詰其定相師不與之辯榮意輕之時信安人競圖師像而尊事皆獲舍利榮因愧服禮像謝憊亦獲舍利歎曰此後不敢以淺解測度矣錢忠懿王感師見夢遣使圖像至適王患目疾展像作禮如夢所見隨雨舍利目疾頓瘳因錫號開明及述

偈讚寶器供具千計端拱初太宗皇帝聞師定力詔
本州加禮津發赴闕師力辭僧再至諭旨特令肩輿
入對便殿命坐賜茗咨問禪定奏對簡盡深契上旨
丐歸復詔入對得請還山送車塞途淳化元年示寂
壽一百十五臘五十七闍維白光屬天舍利五色邦
人以骨塑像至今州郡雨暘禱之如嚮斯荅

梁普靜覺傳

普靜院常覺禪師陳留人也生李氏幼習儒絕無干
祿意志樂山水頗務游觀至廬山歸宗適弘章禪師
開法乃言下有省固求出家未幾章將順寂命師前
撫之曰汝於大法有緣後濟度無量吾呼吸間人耳
不能遂汝志卽以披荆事囑之門人章乃寂師至梁
乾化二年落髮明年納戒於東林甘露壇尋游五臺
抵上都于麗景門外獨居二年有比鄰張生者清信
士也屈師供養偶榻焉其家至深夜與妻竊窺之見
師體遍滿榻中頭足俱出榻外生大驚及令奴婢視
之如常生倍加信敬曰弟子夫婦偕老願割宅前區
以禪丈室可乎師欣然受之後唐天成三年遂成大
院賜額曰普靜師以時機淺昧難任極旨苟啓之非
器謗讟由生未若不言之爲愈于是每月三八日隨

緣行施僧俗受惠者以萬計嘗謂諸徒曰但得慧門無壅則福何滯哉一日給事中陶穀入院見師所爲因問曰經云離一切相卽名諸佛今目前紛然如何離得師曰給事見箇甚麼陶欣然仰重自是王公大人屢薦章服師號皆却不受以開寶四年冬右脇而化

梁重雲暉禪師傳

重雲禪師智暉生成秦高氏總角時卽好游佛寺喜動顏色自誓出家年二十受滿足戒印心于白水仁禪師因愛中灘山水剏屋居之號溫室院日以施水

給藥爲事有比丘患白癩衆惡之師引歸日夕與摩洗久之忽神光異香煥發失僧所在視瘡痂皆異香也梁開平中思故山乃還終南圭峰于是翛然深往獨步岩石徘徊顧望忽見磨衲數珠銅瓶椶笠在石壁間觸之卽壞宛如常寢處遂恍然曰此吾前身道具也因就其處建寺以酌昔因方薙草有祥雲出衆峰間遂名重雲虎豹引去有龍湫險惡不可犯師夷之爲路龍亦去之後唐明宗聞而嘉歎賜額曰長興住持四十餘年接引後學老而無倦節度使王彥超微時嘗從暉游願爲沙門暉曰汝世緣深當爲吾家

垣墻彥超後果鎮永興于是益敬師周顯德三年夏詣別彥超囑以山門事初秋體尚無恙忽說偈曰我有一間舍父母爲修蓋住來八十年近來覺損壞早擬移他處事涉有憎愛待他摧毀時彼此無相礙乃加跌而化閱世八十有四臘六十四塔於本山

周大章清豁冲煦傳

大章山勢如菴主福州永泰人素蘊孤操志探祖道預玄沙之室穎悟幽旨玄沙記曰子禪已逸格則他後要一人侍立也無師自此不務集徒不畜童侍隱於小界山剝大朽杉處其中容身而已凡游僧至皆

隨扣而應有問生死到來如何迴避師曰符到奉行曰然則被生死拘將去也師曰阿唧唧清豁冲煦聞師名造之值師採栗豁問曰道者如菴主在何所師曰從何處來曰山下來師曰因何得到這裏曰這裏是何處所師揖曰那下喫茶去二公方省是師遂至菴夜覩豺虎奔至菴前自然馴擾豁有詩曰行不等閒行誰知去住情一餐猶未飽萬戶勿聊生非道應難伏空拳莫與爭龍吟雲起處閑嘯兩三聲二公尋于大章山創菴請師居之兩處孤坐垂五十二載而化豁亦永泰人少聰敏鼓山國師與落髮初謁大章

後參睡龍龍一日問曰豁闍黎見何尊宿來還悟也未曰清豁常訪大章得箇信處睡龍于是上堂集大眾召曰清豁闍黎出對衆燒香說悟處老僧與汝證明師乃拈香曰香已拈了悟卽不悟睡龍大悅而許之僧問家貧遭劫時如何師曰不能盡底去曰爲甚麼不盡底去曰賊是家親是家親爲甚翻成家賊師曰內旣無應外不能爲忽然捉敗功歸何所師曰賞亦未曾聞曰恁麼卽勞而無功也曰功不無成但不處爲何不處師曰不見道太平本是將軍定未許將軍見太平師後將順世忽捨衆入山乃遺偈曰世人休說路行難鳥道羊腸只尺間珍重苧溪溪畔水汝歸滄海我歸山卽往貴湖卓庵未幾謂門人曰吾滅後將遺骸施諸蟲螿勿置墳塔言訖入湖頭山坐磐石儼然而化門人稟遺命延留七日竟無蟲螿侵食遂就闍維散于林野

煦福州人生和氏幼不染葷血剃度于鼓山得法受記年始二十四卽開法洪州豐城道聲藉藉時稱小長老周顯德中江南國主延住光睦久之移廬山開先後居淨德並聚徒說法開寶八年圓寂三師章嗣玄沙豁嗣睡龍煦嗣鼓山皆雪峰嫡孫

宋風穴沼禪師傳

風穴延沼禪師餘杭劉氏子少魁壘有英氣于書無所不窺然無經世意初祝髮業教義久乃歸禪發跡于鏡清愆公鍼芥不投乃北游湘沔遇守廓上座南院侍者也乃密探南院宗旨忻然赴之初見不禮拜便問曰入門須辯主端的請師分院以左手拊膝師便喝院右手拊膝師亦喝院曰左邊一拍且止右邊一拍作麼生師曰瞎院擬拈拄杖師曰作甚麼奪拄杖打著老和尚莫言不道院倚拄杖曰三十年住持今日被黃面浙子上門羅織師曰和尚大似持鉢不得

得詐言不飢院曰子到此間乎師曰是何言與院曰好問汝師曰也不得放過便禮拜南院喜賜坐命茶因問所與游者何人對曰襄州與廓侍者同夏院曰親見作家來始敘師資禮依止六年辭去至汝水住風穴廢寺日乞村落夜燃松脂單丁者七年而後學徒麈至開法嗣南院法席冠天下傳法者首山念公與廣慧真也一日上堂曰若立一塵家國興盛野老顰顛不立一塵家國喪亡野老安帖于此明得闍黎無分全是老僧于此不明老僧卽是闍黎闍黎與老僧能悟天下人能瞎天下人欲識闍黎麼拊左膝曰

支那

南齊書卷之三

看

這裏是欲識老僧麼拊右膝曰這裏是其辯才無礙
如此以宋開寶六年癸酉八月旦日登座說偈至十
五日加趺而化閱世七十有八坐五十九夏
系曰廓侍者以三喝狎忤老華嚴時師爲維那上方
丈問訊嚴曰汝來適守廓不應當衆扭捏老僧須痛
與一頓趂出師曰趂他遲了也他是臨濟下兒孫本
分如此師舉似廓廓曰汝何必勸止我未問前早要
棒喫得我話行如今搭却我話也穴曰雖然已聞天
下矣廓公四楞場地師壁立萬仞老華嚴一矮人看
場耳臨濟宗所以不可攀仰湊泊也

歸宗詮師傳

禪師名道詮生劉氏吉州安福人也童子棄家事思
禪師思爲剃落受具足戒後聞長沙慧輪禪師思一
見之時馬氏竊據荆楚與建康接壤詮年二十餘結
友冒險造焉會馬氏滅劉言有其地以王逵代劉言
領其事逵見詮輩疑爲謀者捕縛欲投江中詮怡然
無怖逵異之以問輪曰此道人視死如見鼻端何種
人乃能爾輪曰彼蓋爲法忘軀之人聞老僧虛名故
來決擇耳逵釋之加敬詮傲然而去依延壽十年輪
歿詮還廬山乾德初庵于東南牛首峰下開寶五年

洪帥林仁肇請住九峰賜大沙門尋屬江南國絕僧徒例試經業師之衆並習禪觀乃述一偈聞于州牧曰比擬忘言合太虛免教和氣有親疎誰知道德全無用今日爲僧貴識書州牧閱之與僚佐議曰旃檀林中必無雜樹惟師一院特免試太平興國九年南康牧張南金請居歸宗雍熙二年十一月二十八日中夜辭衆而化

法燈欽公傳

泰欽字法燈魏府人也辯才無礙入法眼之室雖解悟逸格未爲人知性忽略不事事嘗自清涼遣化維

揚不奉戒律過時未歸一衆傳以爲笑法眼遣偈往呼之旣歸使爲衆燒浴一日法眼問大衆曰虎項下金鈴何人解得對者皆不契欽適自外至法眼理前語問之欽謂大衆何不道繫者解得於是人人改觀法眼曰汝輩這回笑渠不得也出世初住洪州雙林次遷上藍護國院未幾李國主請住清涼道場乃曰山僧本擬深藏山谷遣日過生緣清涼老人有不了底公案所以出來爲他了却若有人問便說似伊時一僧出問欽曳杖擊之僧曰我有何過欽曰祖禰不了殃及兒孫國主從容問曰先師有何不了公案欽

曰現分析者國主駭之開寶七年六月示疾告衆曰老僧住持將逾一紀每承國王助發至於檀越道侶主事小僧皆赤心爲我默而難言或披麻帶布甚違吾道我之遺骸但于南山大智藏和尚左右乞一墳塚升沈皎然不淪化也又示衆曰但識口必無咎縱有咎因汝有珍重二十四日安坐而逝

奉先深清涼明傳

奉先深清涼智明二禪師者亦雲門嗣也二師同游方時聞僧問法眼如何是色眼豎起拂子或曰雞冠花或曰貼肉汗衫二人特往請益問曰承聞和尚有

三種色語是否眼曰是深曰鷄子過新羅便歸衆時李主在座下不肯乃白法眼曰寡人來日致茶筵請二人重新問話明日茶罷備綵一箱劔一口謂二深曰上座若問話得是奉賞雜綵一箱若問不是祇賜一劔法眼陞座深復出問今日奉敕問話師還許也無眼曰許曰鷄子過新羅捧綵便行大衆一時散去時法燈作維那乃鳴鐘集衆僧堂前勘深衆集燈問承聞二上座久在雲門有甚奇特因緣舉一兩則來商量看深曰古人道白鷺下田千點雪黃鶯上樹一枝花維那作麼生商量燈擬議深打一座具便歸衆

深同明和尚到淮河見人牽網有魚從網透出深曰
明兄俊哉一似箇衲僧相似明曰雖然如此爭如當
初不撞入網羅好深曰明兄尔欠悟在明至中夜方
省二師並出世金陵深于奉先明于清涼皆江南主
虔請也蓮華祥庵主深之嗣西峰豁公明之嗣別具
洞山稟薦福古傳

洞山清稟泉州仙游人生李氏幼禮中峰院鴻謚爲
師年十六福州太平寺受戒初詣南岳參惟勁頭陀
未染指及抵韶陽禮祖塔回造雲門門問曰今日離
什麼處曰慧林門舉拄杖曰慧林大師恁麼去汝見

麼曰深領此問門顧左右微笑而已師自此入室印
悟乃之金陵國主李氏請居光睦未幾復命入澄心
堂集諸方要語經十稔迎住洞山

薦福承古西州人不知誰氏子少爲書生博學有聲
及壯以鄉選至禮部議論不合有司怒裂其冠從山
水中來客潭州了山見敬玄禪師斷髮從之游已謁
南岳雅公雅洞山子知見甚高容以入室後游廬山
經歐峰愛宏覺塔院閑寂求居之清規凜然過者肅
恭時叢林號古塔主初說法于芝山嗣雲門景祐初
范文正公仲淹守饒迎住薦福示衆曰夫出家者爲

無爲法無爲法中無利益無功德近來出家人貪著福慧與道全乖若爲福慧須至明心若要達道無汝用心處所以常勸諸人莫學佛法但自休心利根者晝時解脫鈍根者或三五年遠不過十年若不悟去老僧與汝墮拔舌地獄

系曰師去雲門近百年覽語而悟遂嗣之不疑時雲門子孫方盛無敢異詞者蓋所得真耳不知傳燈何以不錄師耶

首山念禪師傳

首山省念禪師萊州狄

十幼棄家得度於南禪寺

爲人簡重有精識嘗誦法華經衆目爲念法華晚于風穴會中充知客隨衆作止無所參扣然終疑教外有別傳之妙不言也風穴每念大仰識臨濟法道有遇風則止之語懼身當之注意于念一日陞座曰世尊以青蓮華目顧迦葉正當是時且道箇甚麼若言不說而說又成埋没先聖語未卒念便下去侍者進曰念法華無言而去何也穴曰渠會也明日念與真園頭同上問訊穴問真曰如何是真尊不說說對曰鶉鳩樹頭鳴穴曰汝作許多癡福何用因問師師曰動容揚古路不墮悄然機穴謂真曰看渠下語穴一

日又陞座顧視大眾師便下去穴卽歸方丈自是聲名重諸方一日白兆楚和上至汝州宣化穴令師往傳語纔相見提起坐具便問展卽是不展卽是兆曰自家看取師便喝兆曰我曾親近知識來未嘗輒敢如此造次師曰草賊大敗兆曰來日若見風穴待我一舉似師曰一任一任不得忘却師乃先還舉似穴穴曰今日又被汝收下一員草賊也師曰好手不張名兆次日見穴舉前話穴曰非但昨日今日和賊捉敗師後開法首山爲第一世登其門者皆叢林精練衲子然天下稱法席之冠必指首山嘗謂衆曰佛法無多子只是汝輩自信不及若能自信千聖出頭來無奈汝何何故如此爲向汝面前無開口處祇爲汝自信不及向外馳求所以到這裏假如便是釋迦佛也與汝三十棒然雖如是初機後學憑箇什麼道理且問汝輩還得與麼也未良久曰若得與麼方名無事僧問臨濟喝德山棒未審明什麼邊事師曰汝試道看僧便喝師曰瞎僧又喝師曰這瞎漢只管亂喝作麼僧禮拜師打之因曰諸上座不得胡喝亂喝尋常向汝道賓則始終賓主則始終主賓無二賓主無二主若有二賓二主卽是兩箇瞎漢所以我若立汝

須坐我若坐汝須立坐則共汝坐立則共汝立雖然如是也須著眼始得師道被天下移寶安山廣教院衆不過四十輩老於寶應淳化三年十二月四日留僧過歲作偈曰吾今年邁六十七老病相依且過日今年記取來年事來年記著今朝日至明年是月是日陞座辭衆曰白銀世界金色身情與無情共一真明暗盡時都不照日輪午後示全身言訖安坐日將昃而逝茶毘得五色舍利塔于首山

系曰當大仰爲識時馮山固問之仰良久曰將此身心奉塵刹是則名爲報佛恩卽有越俎代庖之意故首山卽大仰後身無疑也伸脚在縮脚裏又何怪馮仰之後寥寥哉

汾陽昭葉縣省神鼎謹三禪師傳

汾州太子院善昭禪師生太原俞氏器識沈邃少緣飾具大智少失恃怙旣孤苦雅不喜世俗遂祝髮受具杖策飄然所至不稍停覽乃曰從上先德行脚正以聖心未通驅馳決擇耳不緣山水也歷參七十一員知識最後至首山問百丈卷席意旨如何山曰龍袖拂開全體現進曰師意如何曰象王行處絕狐踪于是大悟拜起曰萬古碧潭空界月丹三撈捩始應

知有問者曰見何道理便爾自肯曰正是我放身命處自是陸沈襄沔間每爲郡守以名利力致前後八請堅臥不起及首山歿西河道俗協心削牘遣沙門契聰請師住汾州太子院師時方閉關聰排闥入讓以大義曰佛法大事靖退小節風穴懼應識憂宗旨陸滅幸有先師先師棄世汝有力荷擔如來大法者今何時欲安眠哉師起握聰手曰非公不聞此語趨辦巖吾行矣旣至燕坐一榻足不越閫者三十年天下仰曰汾陽而不敢名一日上堂謂衆曰汾陽門下有西河師子當門踞坐但有來者卽便咬殺有何方便

入得此門見得此人若見此人者堪與祖佛爲師不見此人盡是立地死漢如今還有人入得麼快須人取免負平生不是龍門客切忌遭點額那箇是龍門客一齊點下舉起拄杖曰速退速退珍重并汾地苦寒師罷夜參有異僧振錫至謁師曰會中有大士六人奈何不說法言訖升空而去師密記以偈曰胡僧金錫光請法到汾陽六人成大器勸請爲敷揚時楚圓守芝號上首叢林知名龍德府尹李侯與師有舊虛承天致之使三反不赴使者受罰復至曰必欲得師俱往不然有死而已師笑曰老病業已不出院

借往當先後之何必俱耶使者曰師諾則先後唯所擇昭令設饌且俶裝曰吾先行矣停箸而化有侍者出衆曰和尚到處某甲卽到亦立化歸

省禪師住葉縣廣教院冀州賈氏子也弱冠依易州保壽院出家受具後游方參首山山一日舉竹篋問曰喚作竹篋卽觸不喚作竹篋卽背喚作甚麼師掣得擲地上曰是甚麼山曰瞎師于言下豁然頓悟浮山遠公其得法子也

洪譔者生扈氏襄水人自受首山印記隱衡岳三生藏有湘陰男子來游卽師室見師氣貌閑靜一鉢掛

壁莫能親疎愛之忘去謂曰師寧甘長客于人亦欲住山乎家神鼎下鄰寺乃吾世植福之地久無住持者可俱往師笑曰諾乃以巴馬馱師還十年始成叢席一朽床爲說法座甘枯淡無倫比僧契嵩少時游焉師坐堂上受其展指庭下兩小甕詫曰汝來乃其時寺始有醬食矣明日將粥一力挾筐取物投僧鉢中嵩睨上下有卽咀嚼者有置之自若者嵩袖之下堂出以觀皆碎餅餌問諸耆老曰此寺自來不煮粥脫有檀越請應供譔次第撥僧赴之祝令攜乾殘者歸納庫下碎焙之均而分俵以當麵也堂頭言汝來

適丁其時良然嵩大驚止此已見譔老平生爾他具
燈錄

系曰頌古自汾陽始觀其頌布毛公案曰侍者初心
慕勝緣辭師擬去學參禪鳥窠知是根機熟吹毛當
下獲心安與胡僧金錫光偈看他吐露終是作家真
寔宗師一拈一舉皆從性中流出殊不以攢華疊錦
爲貴也

谷隱聰廣慧璉二師傳

禪師諱蘊聰廣州張氏子初參百丈恒不契乃見首
山問學人親到寶山空手回時如何山曰家家門前

火把子言下大悟呈偈曰我今二十七訪道曾尋覓
今朝喜得逢要且不相識後住襄州谷隱山諸方稱
谷隱聰云達觀穎者其克家子也別具傳

元璉禪師泉州陳氏子福顧廣穎瞻視凝遠望見令
人意消參首山山問近離何處璉曰漢上山豎起拳
曰漢上還有這個麼曰這是甚麼盪鳴聲山曰瞎璉
曰恰是拍一拍便出他日又見於火把子話下大悟
云某甲不疑天下老和尚舌頭也後出世汝州廣慧
院華嚴隆爲嗣法上首楊龜山大年亦出師位下有
寄內翰李公書敘師承本末云

系曰首山一把火前燒谷隱後燒廣慧二老故得出
頭光燄又有二智嵩一住三交一住鍊佛亦首山門
下皎皎者也不及傳

補續高僧傳卷第六 終



國家圖書館, NATIONAL CENTRAL LIBRARY, TAIWAN, R.O.C.

補續高僧傳卷第七

明吳郡華山寺沙門明河撰

習禪篇

宋大陽玄傳

大陽禪師警玄江夏張氏子也其先蓋金陵人仲父
爲沙門號智通住金陵崇孝寺師往依之年十九爲
大僧聽圓覺卽能辯屈講者歎曰是齒少而識
卓如此我所有何足益之通知之使令游方初謁梁
山觀禪師問如何是無相道塲山指壁間觀音像曰
此是吳處士畫師擬進語山急索曰此是有相如何

是無相者於是悟旨於言下拜起而侍山曰何不道取一句子師曰道卽不辭恐上紙墨山笑曰他日此語上碑去在師獻偈呈解山稱以爲洞上之宗可倚師亦自負儕輩莫敢攀一時聲名藉甚山歿出山至大陽謁堅禪師堅欣然讓法席使主之退處偏室咸平庚子歲也師神觀竒偉有威重從兒稚中卽日一食自以先德付受之重足不逾限脇不至席者五十年浮山遠公居衆時嘗參師於大陽師以臘高無可繼法之人一日喟然謂遠曰洞上一宗如懸絲欲斷惟汝興之遠曰有平侍者在師以手指胷云平此處

不佳又捏拇指叉中示之云伊向去當死於此於是
以皮履布襪付遠囑令求人以天聖五年七月十六
日陞座辭衆又三日作偈寄王曙侍郎偈曰吾年八
十五修因至於此問我歸何處頂相終難覩擲筆而
化遺囑云瘞全身十年無難當爲大陽山打供入塔
後果爲平侍所戕平亦坐是返俗流浪無依爲虎所
食師言驗矣遠受大命得青華巖轉付履襪嗣師法
焉

慈明圓禪師傳

石霜楚圓禪師號慈明汾陽嫡嗣也生全州李氏少

爲書生年二十二出家母有賢行使游方師連眉秀目頎然豐碩然忽繩墨所至爲老宿呵以爲少叢林師柴崖而笑曰龍象蹴踏非驢所堪嘗橐骨董箱以竹杖荷之游湘沔間聞汾陽道望遂與大愚谷泉瑯琊造焉陽顧而默器之經二年未許入室每見必罵詬或毀詆諸方所訓皆流俗鄙事一夕訴曰自至法席已再夏不蒙指示但增世俗塵勞念歲月飄忽已事不明語未卒陽熟視罵曰是惡知識敢裨販我怒舉杖逐之師擬伸救陽掩師口乃大悟曰乃知臨濟道出常情服役七年辭去依唐明嵩公嵩指會楊大

年因大年復會李都尉二公恨見之晚館於齋中日夕質疑智證以爲法友久之辭還河東省唐明李公遣二僧訊師師於書尾畫雙足寫來僧名以寄之李作偈曰黑毫千里餘金榔示雙趺人天渾莫測珍重赤鬚胡師以母老南歸至筠州首衆於洞山時聰禪師居焉先是汾陽謂師曰我遍參雲門兒孫特以未見聰爲恨故師依止三年乃游仰山大年以書抵宜春太守黃宗旦使請師出世守虛南原致師師不赴旋特謁候守願行守問其故師曰始爲讓今偶欲之耳守大賢之住三年棄去省母以白金爲壽母投金

于地罵曰汝少行脚負布橐去今安得此物吾望汝濟我反置我地獄耶師色不怍徐收之辭去謁神鼎謹公鼎首山高弟望尊一時衲子非人類精竒無敢登其門者住山三十年門弟子氣吞諸方師髮長不剪弊衣楚音通謁稱法姪一衆大笑鼎遣童子問長老誰之嗣師仰視屋曰親見汾陽來鼎杖而出顧見頽然問曰汾州有西河師子是否師指其後絕叫曰屋倒矣童子返走鼎回顧相矍鑠師地坐脫隻履而視之鼎老忘所問又失師所在師徐起整衣行且語曰見面不如聞名遂去鼎遣人追之不可歎曰汾陽

乃有此兒耶師自是名重叢林適道吾虛席郡移書欲得大禪伯領之鼎以師應召法令嚴整亡身爲法者集焉師之大機大用不可思議傳者謂師以事事無礙行心凡聖不能測可爲知言矣水庵謂尤侍郎延之曰昔大愚慈明谷泉等結伴參汾陽河東苦寒衆人憚之惟慈明曉夕不憚夜坐欲睡則引錐自刺歎曰古人爲生死事大不食不寢我何人哉乃縱荒逸生無益於時死無聞於後是自棄也及辭歸汾陽歎曰楚圓今去吾道東矣次住福嚴又移興化嘗室中插劍一口以草鞵一對水一盆置在劒邊擬議者